

762
912
3.16
P=



中国国家图书馆
NATIONAL LIBRARY OF CHINA

師竹廬聯話卷十一

錫山拙翁寶鎮編輯



格言

古人楹帖必用格言毘陵某氏懸聯云雖無真學問賴祖宗根基
未曾出醜也有惡心思留子孫地步不敢輕爲又聞友人述一聯
云且少從容萬事皆由忙裏錯莫圖便易好人都自苦中來可作
座右銘乾嘉間有汪信號可生者里居未詳相傳其自撰堂聯云
寶善數家珍有訓辭無玩好讀書成國士先器識後文章極平常
陳熟語而渾成乃爾至今玩味猶想見先輩敦品立行庸德庸言
往往足爲後人矜式此正聖賢教人不離布帛菽粟也



中国国家图书馆
NATIONAL LIBRARY OF CHINA

近日在高氏花園見一楹帖係桐城張君遜先所書其語與園林
毫無關涉却有格言意爰錄攜歸句云光陰迅速便朝夕讀書寫
字能得幾何必毋怠毋荒趁早年埋頭用力時世艱難卽尋常穿
衣喫飯已非容易須克勤克儉免後來仰面求人憶昔年侯石琴
世丈書齋中懸一聯與此大同小異句云光陰迅速縱認真讀書
寫字還恐蹉跎亟宜振刷精神趁此埋頭用力稼穡艱難若但知
吃飯穿衣何來生活休染因循習氣貽羞仰面求人不忍割愛亦
錄而並存之陳蓮史先生撰偶語云君子澹交還是澹中交可久
好人難做須從難處做方成侯世丈每喜書此句故得見之聞友
人言某處官齋懸聯曰爲政戒貪貪利貪貪名亦貪勿務聲華忘

政本養廉惟儉儉己儉儉人非儉還從寬大保廉隅

餘姚孫忠烈公燧爲明陪都大宗伯殉宸濠之難繼室楊夫人尤
賢其訓子聯云愛惜精神留此身擔當宇宙蹉跎歲月將何日報
答君親後諸子皆顯達誠母教也先儒某完姻撰楹帖自勵云撫
躬不是孩提憂患多從今日始轉瞬卽爲父母劬勞翻自養兒知
此意未經人道吾邑嵇桂山明經讀書自好方正清廉一邑推爲
醇謹士作偶語懸於書室云隨時隨地留心積善惜寸惜分發憤
讀書孫叔方孝廉爲人書堂聯云莫謂自由便可作惡須知倖福
也要良心嘉其新而有格言之意故錄之顧雲笥茂才一生儉樸
深惡浮華家懸偶句云老屋數間祖宗基業破書幾本子孫詒謀



言頗古茂有至理存焉

蘇州元和陸鳳石殿撰潤庠於松寥閣題楹聯云欲除後悔先修己各有前因莫羨人雋永有味聞友人言見某處懸一聯云讀書即未成名究竟人高品雅脩德不期獲報自然夢穩心安又述一聯一係欲高門第須爲善要好兒孫必讀書一係立品定須成白璧讀書何止到青雲憶昔年在某君書室見柱聯曰觀天地生物氣象學聖賢克己工夫數聯俱宜置座右以自勵

番禺莊滋圃先生有恭撫浙時手書客座楹帖曰常覺胸中生意滿須知世上苦人多識者已知爲宰相之器人生自少至壯罕有全履泰境者惟耐得挫磨方成豪傑不但貧賤是玉成之美卽富

貴中亦不少困境此處立不定腳根終非真實學問吾邑秦潛叔明經集聯云五閒箴考父三節仰湘鄉朱文公有戒閒思慮閒出入閒涉歷及接閒人與閒事曾文正公有節勞節慾節飲食之語吾祖俊三公集句格言聯云言思忠事思敬智欲圓行欲方王君仲華謂余曰曾見俊三先生書此句至今未忘真我輩處世之大要也聞某家懸偶語云學破愚儉養廉勤補拙居處恭執事敬與人忠樸實說理洵自脩要旨

晚紅軒所錄楹帖其格言有甚可愛者如道以反身而誠者上人惟中立不倚爲難 於心能安於理亦得惟勤有益惟公乃明於世俗中見本來面處家庭內無利己心 學道人能精明世故



性天內見涵養功夫 到知非時聞過則喜能自卑者益尊而光
於不覩聞時能戒懼可從行習內得精微 世不可無名師益
友人安容有滿志矜心 崇德獨行人思御李脩身明道我欲瞻
顏 以文爲富以道爲貴居安若危居高若卑 行無不可對天
之事思必有益於世乃言以上各聯半係集爭坐位帖字
三鳳草廬藏有格言楹帖抄本頗工穩有味五言云養胸中正氣
學天下好人 序天倫樂事讀孔氏遺書 利人終有益克己自
無私六言云作事須循天理出言要順人心 靜坐常思己過閒
談勿論人非 處事須留餘地責善切戒盡言七言云利人時出
有益語修己常存改過心 事不再思終有悔氣能一忍可無憂

欲子孫賢必積德要門庭顯還讀書 平生事業惟安命第一
工夫在謹言 緜世澤惟在孝友振家聲不外詩書八言云作德
日休爲善最樂知足不辱能忍自安 孝弟力田君子務本詩書
執禮聖人我師 獨坐防心羣居守口開卷有益作善降祥長聯
云孝弟忠信禮義廉恥是撐天八根大柱慈愛溫良謙和敬讓真
涉世幾箇神方 體兩句如之何天下無難事存三個必自反世
間皆好人 孝于親弟于長慈于幼可爲成人矣禮以行孫以出
信以成不亦君子乎 書是良田傳世休言無厚產仁爲安宅居
家何用有華堂 孝弟慈父子兄弟足法知仁勇天下國家可均
天地無私爲善自然獲福聖賢有教修身可以齊家 勿忘祖

父艱難宜務勤思儉要作兒孫榜樣須蹈義懷仁均足垂戒
近聞楊某述格言楹帖云吃苦是良謀度苦日用苦功費苦心苦
境終歸樂境偷閒非善策說閒話好閒遊理閒事閒人卽成廢人
憶先祖俊三公喜書格言有句云忍而和齊家上乘公與正處世
良謨咸豐時自書偶語懸於座右云百鍊此身成鐵漢三緘其口
學金人近見昔年爲人書聯語有二一係修己惟清心最要涉世
以慎言爲先一係省察謹嚴心如秋肅存養冲粹氣若春溫以上
皆可作箴銘以自勵者

身世準繩吾邑李觀文先生纂輯傳世已久其中可爲家懸楹帖
者甚多如慎乃百年提撕緊鑰敬爲千聖授受真源 百善孝居

先若推孝以友兄弟則善更大萬惡淫爲首倘因淫而肆殘暴其
惡彌深 融盡性情上偏私斯爲真學問消得家庭內嫌隙便是
大經綸 文章無益身心縱工何用著作有資勸戒雖拙可觀
思立掀天揭地事功須薄冰上履過欲做美玉精金人品要烈火
中鍛來 居家戒奢尤戒嗇處世忌寬亦忌嚴 求足何能足知
足便足待閒安得閒偷閒自閒 道不必大行要有裨民物官何
須尊顯期無負君親 公正嚴明爲做家長良法安詳恭敬是教
小兒善方 處衆固宜和尤當具強毅莫能奪之力持己須以正
要貴有圓通不可拘之權 意念沈潛於理能盡得志氣奮發何
事不可爲洵有裨於人心世道之言

有張杏村者里居未詳自製楹聯云想行路出門難但得居家便是福除讀書寫字外別無生計所以窮樸實說理頗有味沈石翁用熙集成語爲人書楹帖云受人以虛求是於實所見者大獨爲其難亦具至理南海徐佩章先生爲子授室自撰偶語云女無不愛媳無不憎願世上翁姑推三分愛女之情以愛媳妻易於順親易於逆望汝曹人子減半點順妻之意而順親通達人情慨乎言之矣江西百花洲有一聯云盡力量爲善養精神讀書語精警有氣勢係安化陶雲汀制軍手筆

師竹廬聯話卷十一終

師竹廬聯話卷十二

錫山拙翁寶鎮編輯

雜綴

番禺潘蘭史徵君六十自題齋聯云圖史兩間樓便是老來行樂地江湖多暇日補讀平生未見書楊菊仙大令建裘學樓落成汪憲仲孝廉撰聯賀之句云世德繼銜鱣累葉都成清白吏奇才真吐鳳此間可草太元文昔有友人述一楹帖云父戊子子戊子父子戊子師司徒徒司徒徒司徒上聯指橋梓俱戊子科中式下聯指師弟均爲司徒官頗工巧

丘文莊瓊山幼從師於里宦之家聰敏有聲宦兒劣不好學凡師

外出宦兒卽歸一日天雨丘獨坐書室雨滴其肩丘乃與宦兒席
對換宦兒具告師師曰能偶對者理直因言點雨滴肩頭丘卽言
片雲生足下師稱善宦兒不能對哭告其父父怒試以對曰孰謂
犬能欺得虎丘應聲答云焉知魚不化爲龍宦歎賞顧東橋撫掌
張江陵初應童子試東橋曰能屬對乎曰童子略能因以雛鶴學
飛萬里風雲從此始兩句使其對張隨口答云潛龍奮起九天雷
雨及時來顧大喜頗加嗟賞并云此兒他日貴過我也

蕉溪奚載春詩才卓絕更擅屬對記其五一自壽云家人六七輩
沽酒十千會飲三杯也算慶祝余生五一年拙荆四九合成百歲
總是痴頑多用數目字毫無斧鑿痕洵佳構也某鎮有陳某兄弟

二人知名士也兄涵於酒弟染煙癖好事者戲贈以聯云阿兄酒
色雞冠紫乃弟煙容鴨蛋青堪稱工絕東坡佛印琴操相往來一
日佛印至蘇家見琴操卧於紗厨內戲曰碧紗帳裏睡佳人烟籠
芍藥琴操對曰青草池邊洗和尚水浸葫蘆佛印大笑曰和尚對
娘子實出意外

淮安毛子喬孝廉松齡幼負雋才比壯文名益噪屢上公車不售
頗侘傺不自得晚舉一子會其初度日自撰楹帖云陽月建辰我
已如嶺上梅花安能及公門桃李耆年得子人道是海中仙果差
堪慰晚景桑榆九江蔡燕山平生嗜古成癖金石書畫收藏甚富
浮沉翰苑十餘年死後一貧如洗嘗戲作一聯云拚將唐宋元明

草賺取歐非亞美錢可想見其風格矣

毘陵張曉帆明經余同案友也才華頗富教讀之暇戲撰偶語云
少日讀諸子百家雄文健筆起鳳騰蛟呼曹植酌斗論才何妨伯
仲老來築名園五畝接果栽花養魚放鶴遇郭泰入林把臂卽是
神仙氣勢蓬勃惜無人能當此語一日遇汪葆素茂才談及庚午
正月二十二日晚夢至一寥廓之區高臺十餘丈懸有楹帖書法
頗蒼勁枯枝秃梗非凡手可及句云大千秋色在眉頭看徧了玉
海金山重游瞻部九萬春花如夢裏會記得了歌甲舞高臥崑崙
醒而問之友人知是京師戲館聯噫異矣楹聯何必入夢哉又汪
茂才在金陵時旅舍無聊作楹帖云狂花滿屋病葉半牀我醉欲
酣眠亂疊青山鄉國夢長煙一空皓月千里秋深難作客相思紅
豆旅人情洵是旅客之情才子之筆

泰州姜堰鎮河干有酒樓數椽屋宇欹傾久不修葺有人題偶句
於壁云好一座危樓誰是主人誰是客祇三間老屋半宜明月半
宜風頗得味外味而一種登樓感慨憑弔今昔自然流露咸豐十
年四月初十日吾邑失陷萬民塗炭自克復後每於是日聚僧衆
於崇安寺大修佛事燒紙郵孤孫勗三明經著楹帖懸於齋堂句
云大義在人心看此時烟裏灰飛猶動道旁歌泣清齋修佛事願
昔日忠魂毅魄不終地下沉埋意切句工王武愍公七十冥壽侯
景文先生撰偶語云完大節於黃鶴樓中取義成仁光億萬年之



俎豆祝遐齡於白雲鄉裏如生介壽合八千歲爲春秋家曉湘老
廉作聯云奇忠獨巨千秋在天爲日星在地爲河嶽介壽剛逢七
秩事死如事生事亡如事存均以冥慶盡忠兼敘頗覺不泛

洪承疇幼讀寺中一日師他適其友來訪衆童方遊戲見客至歸
歸坐而洪戲如故客叱其何故不讀書洪曰熟矣客因舉三尊菩
薩坐獅坐象坐白蓮以難之洪略思索卽對曰一堂學生攀鳳麟
龍攀丹桂客奇之言於其師師問之洪不認師乃述原句命其更
對述時誤白蓮爲蓮花承疇遂以一堂學生偷鴨偷雞偷蘿蔔對
人以是知承疇之必貴但恐其不爲純臣耳後果然

上海某舞臺懸楹帖云休羨他快意登場也須夙世根基纔博得
屠狗封侯爛羊作尉姑借爾寓言醒世一任當前炫赫總不過草
頭富貴花面逢迎聞作者薛慰農也丁植卿孝廉作偶語贈巧雲
曰巧兮倩笑笑兮盼雲想衣裳花想容某相國集成語贈妓張少
卿曰少之時不亦樂乎卿以下何足算也爲一時壓卷錢揆初太
守撰楹句贈月梅女道士云不知月色爲誰好要與梅花作伴來
亦傳誦周文之太守贈妓月仙聯曰對風月清談恍來天上似神
仙眷屬小謫人間又贈妓謝寶蓮偶句云自古謝家多寶樹從來
周子愛蓮花可謂巧合天然不涉牽強

某地有鼎升客棧其客廳懸聯云賓至如歸教庖人善調鼎鼎春
來且樂勸旅客莫問升沈頗瀟洒浴池聯甚少佳者更無近見一



聯殊覺超脫句係到此皆潔己士相對乃忘形交孫勗三茂才尊
人冥慶大修佛事嚴笑拈先生書楹帖云法雨散蓮臺試憑佛號
干聲敬當祝嘏流風垂梓里不愧書香一脈代有傳人吾友汪葆
素亦有聯云愛日如生幽與明總驚歲序遺風猶在子若孫不負
家聲茶酒肆聯佳者甚少惟毘陵周伯恬先生所撰者最佳句云
爲名忙爲利忙忙裏偷閒吃杯茶去謀衣苦謀食苦苦中作樂
碗酒來聞友述茶店聯云一雙脚行不盡世間路莫慌忙暫停履
七尺軀能擔當古今事且放下可吃茶又聯云四大皆空坐片刻
無分爾我兩頭是路吃一杯各自東西事雖俚俗句頗有味

海門昔有金蘭室煙館屋宇精潔庭院植梅竹室懸楹帖云斯品
幾生修得到此君一日不可無語意微妙可思嚴笑拈師吾邑名
下士也作偶語題時憲書句云分至啟閉必書斯稱盛治歲月日
時無易是謂大同又撰聯贈黃紫英曰相業媿隆心存濟世父書
能讀學有傳家紫英爲濟慎醫士之子棄儒習岐黃承父志也有
客幕遊燕趙間老而矢志作楹帖自嘲曰白髮蕭然見他人兒女
夫妻十分恩愛黃金盡矣奈今日油鹽醬醋百計安排此閱耐冷
談見之秦研樵明經撰聯自述云四朝養庠老諸生兒曹出仕孫
輩讀書福分本山天得趣直超三樂境半世天涯浪遊子文愜己
心詩傳人口工夫可道古成章自著一家言對語頗佳惟稍嫌自
譽光緒乙巳余襄權蘭溪是年元旦立春晨見微雪戲作一聯云



歲朝春同人萃泰元旦雪大有恆豐某年朝夜雨聲不住口占偶句云青草池塘邇日鳴蛙正聒耳黃梅時節今年大雨尤驚心連日傾盆大雨殊覺悶人竟有荒歉之象所以聞而驚也

昔有友人自鄂歸述黃鶴樓懸楹帖云爽氣西來天地掃開雲霧憾大江東去波濤洗盡古今愁又述曾遊金陵見莫愁湖勝棋樓有沈鏗所撰楹句云江水東流淘盡了千古英雄兒女石城西時依舊是六朝煙雨樓臺余長孫鳳藻之太岳顧石仲先生治喪余輓以聯云吾長孫儷君女孫仰講學宗風早侔望耆英洛社弟先逝會兄繼逝援修文故事合同歸兜率天宮南皮張筱帆中丞曾敷堯楊筱荔觀察作偶語輓云勛名齊文達文襄我幸何緣曾護

儲胥依玉節出處繫世治世亂公歸不復坐看荆棘沒銅駝中丞秉性剛直任浙江巡撫多年官聲卓著人感不忘

蔚州賈槐三先生以翰林宰河南汲縣武陟三次因案撤省後一次繼之者爲榮城孫六皆因自撰大門聯語云運是子文又作三春幻夢才慙孫武常存一片婆心以子文對孫武工極昔年聞同學友趙翼孫明經口述二聯今尙未忘其一曰丁中丞縱子殺人殺人不償命譚觀察因妻借債借債不還錢其二曰其權在升遷補降之中句句不離柴擠話乃病於癡膈瘋癆而外年年長發桀花癡均可供談笑聞某處有一小園係乾隆初所築近年因園主家况窘迫久失修葺漸漸荒廢邇更屋宇有傾倒之勢其中之人



他徙某君見而憐之作聯曰月落五更殘烏烏有情還自淚秋深
三徑冷黃花無主爲誰凋惋惜情深措詞不苟

杭州西湖蘇小小墓王成瑞題偶句云燈火珠簾儘有佳人居北
里笙謔畫舫獨教芳塚占西冷其附近有曲院荷風亦勝地有人
撰楹帖云風片雨絲應留佳客藕船荷浪是生好詩其西邊栖霞
紫雲兩洞之下有岳王墓某君題偶語云幾道殉金牌取義成仁
南渡江山傾半壁一門憐鐵漢父忠子孝西湖風月弔千秋又聯
云凜凜生氣悠悠蒼天八字中包括無數意議吾邑西門外高松
舟封翁之父西山先生八秩冥慶家曉湘孝廉作楹帖云綽有古
風九陞絲綸褒碩德依然幾日一庭蘭玉奠華觴吾友汪葆素茂

才撰聯云法雨散蓮臺全憑誦佛緡經一心祝嘏流風垂梓里猶
想施貧活族合口稱仁張子惠明經文才卓著尤長於楹聯作偶
語輒凌伯升茂才云由來長吉慣嘔心誦千百家賢哲詩文獨關
町畦瓣香平日宗韓愈聞道闔閭傷將指剩數十卷叢殘著述誰
爲編纂賞音並世待侯芭指侯伯文茂才允爲編遺稿而言

長沙廣福菴供闕帝梁卓燕於神座題楹帖云平生爲昭烈帝誓
殄國讎雖傲矜亦義勇所在今日與文宣王抗衡廟食是豪傑可
聖賢之徵沈文肅公葆楨夫人林文忠公則徐女也沒後治喪有
佐貳某君作聯輓云爲名臣女爲名臣妻江右佐元戎錦繡夫人
分偉績於中秋生於中秋逝天邊圓皓魄霓裳仙子證前身吾邑



顧峻夫明經以優貢朝考華嘯雲孝廉撰偶語賀之云惟明經與
進士同盛以學術增吏治之光有某集四書語爲楹帖懸於恆善
堂句係得見有恆斯可矣願無伐善其庶乎嵌恆善二字頗天然
汪葆素茂才作竈神聯云人有調羹樂家無煮豆譏孫伯素茂才
亦有聯云心地無他國糟不事塗門戶家寒有素獻歲何須覓犬
羊雖明安然不及汪作之簡括多意味

師竹廬聯話卷十二終





中国国家图书馆
NATIONAL LIBRARY OF CHINA